

lis Gnovis

OSÔF. Ribel ta l'anime

Domenie ai 27 di Març, e fâs debut l'ultime produzion de compagnie «Anà-Thema Teatro». Al sarà il spettacul in onôr e in favôr dal frari poete David Marie Turollo (Coder, 1916-Milan, 1992) «Anima Ribelle Padre David Maria Turollo». La raprezentazion e tacarà a 18, li dal «Teatro della Corte» di Osôf. Sul palc a montaran Luca Marchioro e Raffaella Giampaoli, direzûts di Luca Ferri. Intant dal spettacul e sarà proponude ancje la cjante originâl «Anima ribelle» di Federica Copetti. L'operazion poetiche e je patrocinade dal Cetri studi «Padre David Maria Turollo» (info@anathemateatro.com - 345 3146797 - 0432 1740499).

ROME. Agrât pes virtûts di Eduardo Pironio

Martars ai 29 di Març, il prefet de Congregazion pes Glesis orientâls, gardenâl Leonardo Sandri, al cjantarà une liturgjie eucaristiche par ringraziâ pal fat che il gardenâl Eduardo Francisco Pironio al à stât proclamât venerabil. La celebrazion e tacarà a 17.30 li dal Coleç internazionâl dai «Legionari di Cristo», a Rome. La Congregazion des Causis dai Sants e à vût l'autorizazion di Pape Francesc di promulgâ il decret su lis virtûts eroichis dal gardenâl argjentin di riunde furlane, ai 19 di Fevrâr. Eduardo Pironio al nassè ai 3 di Dicembar dal 1920 a Nueve de Julio, dulà ch'a jerin emigrâts so pari Giuseppe di Percût e sô mari Enrica Buttazoni di Pavie di Udin, e al muri a Rome ai 5 di Fevrâr dal 1998, dopo di jessi stât vescul di Mar del Plata e president dal Consei pontifici dai Laics.

TURIN. Il cine di Fredo Valla

«Glocal Film Festival», «Piemonte Movie» e «Cinema delle Valli», fintremai ai 27 di Març, a proponin la rassegne culturâl «Omaggio a Fredo Valla», cun apontaments li dal «Cinema Massimo» e dal «Polo del '900» di Turin, li di Villar Perosa e a Perosa Argentina. Di chê strade, si podarà tornâ a viodi une cercje dai cines plui impuartants dal regjissêr e senegjatôr ocitan (www.fredovalla.it). Fra lis sôs oparis plui innomenadis «Il vento fa il suo giro» e «Volevo nascondermi» (ch'al à scrit la senegjature cul regjist Giorgio Diritti) e po lis oparis ch'al à direzût a muse: «La strada dei capelli» (2006; cuntune version par furlan, «Cjavelârs e Pelassiers», ch'è explore ancje i rapuarts fra Valadis ocitanis e Cjargne - https://arlef.it/it/video/cjavelars-e-pelassiers/), «La barma» (2013) e «Bogre - La grande eresia europea» (2021) e, par ocitan, «E i a lo solelh - Francois Fontan e la descuberta de l'Occitania», cun Diego Anghilante (1996).

TEÔR. Pai boscs ad ôr de Stele

Te suaze dal progjet internazionâl «Life Star» e dal progjet «GoProFor», l'impresa di comunicazion «Compagnia delle Foreste» e à produsût un documentari su la conservazion dai boscs diluvionâi ad ôr de Stele, tal Cumon di Rivignan e di Teôr. I intervets pal recupar e pal miorament dal «habitat 91E0*» dal «Sic Risultivis de Stele», daspò des menacis causionadis des bonifichis e de invasion de agriculture intensive, a son presentâts dal dotôr forestâl Enrico Siardi. Il film al pues jessi rimirât a la direzion: www.youtube.com/watch?v=3CN2rw57Ba o. Une presentazion e pues jessi lete tal periodic «Rivista Sherwood» (www.rivistasherwood.it/tematiche-1/video-e-podcast-2/conservare-le-foreste-alluvionali.html).

Mercus 23	S. Turibi vescul	Domenie 27	IV Domeni Cuaresime
Joibe 24	S. Romul martar	Lunis 28	S. Sist III pape
Vinars 25	S. Marie Nunziade	Martars 29	S. Secont martar
Sabide 26	S. Emanuêl martar	Il timp	Zornadis serenis.



Il soreli
Ai 23 al jeve aes 6.05 e al va a mont aes 18.23.



La lune
Ai 25 ultin cuart.

Il proverbi
Dal lavôr si cognòs il mestri.

Lis voris dal mès
Cuingait lis vits e i pomârs; chesj a van tratâts cuintri dai parasits, massime i pedoi.

Comandaments ecologjics

Propuestis e impegnis concrets pes Glesis fiis di Aquilee

Lis Glesis de Patrie ce rispueste ur dano ai zovins che ai 25 di Març a tomin in place par protestâ cuintri dal pericol mortâl de crisi climatiche e par domandâ di protezî la clime? L'Encicliche «Laudato si'» aie inviât chê «conversion ecologjiche» tant bramade di Pape Francesc par meti in vore, cence slaihs, l'«Ecologjie integrâl», necessarie par fermâ il model economic «predatori, gjenocidiari e ecocidiari» ch'al menace l'Umanitât? Ogni Comunitât e po burî fûr imprescj par tamesâ chestis cuistions su la «Plateforme di iniziativa Laudato si'» (https://piattaformadiiniziativa-laudatosi.org/chi-siamo/), nassude de colaborazion fra il Vatican e une coalizion internazionâl di organizacions catolicis, e domandant il «Moviment Laudato si'» (https://laudatosimovement.org/gccm-announces-its-new-name-laudato-si-movement/), nassût 7 agns indaûr par ispirâ e par coordinâ l'azion di ducj i cristians ch'a son daûr a messedâsi par meti in vore i principis de Encicliche «Laudato si'» (rispuindi al berli de tiere e al berli dai puars; economie ecologjiche; mûts di vivi te sostenibilitât; formazion e spiritualitât ecologjichis; resilience e valorizazion des Comu-



Ai 25 di Març, al tome il «Siopar globâl pe clime»

Biel che la zoventût e torne in place par domandâ justizie sociâl e climatiche

nitâts). Un altri pas ancjemò al è chel proponût a dutis lis Diocesis dal mont. «Te Glesie catoliche, a esistin passe 2 mil e 800 Glesis diocesanis - al marce, tal so lûc internet, il «Moviment Laudato si'» - e ognidune e à il podê di fâ diventâ «Laudato si'» te sô Comunitât. Ve chi ret 10 mûts che la tô Diocesi e po vè curie dal Creât di Diu

parie, par dut il timp dal an». Il «vadecum» al è publicât su la pagine web https://laudatosimovement.org/it/2022/01/03/10-modi-cura-creato-diocesi/, dulà che i «Comandaments ecologjics» a figurin cussì: 1. Nomenâ cualchidun ch'al sedi impegnât a meti in vore «Laudato si'» par dut il timp dal an, tes Parochiis e intes organizacions diocesanis; 2. Inmanea un grop di esperts par conseâ la Diocesi su la riduzion de «olme ambientâl»; 3. Stabili un Plan diocesan par infuâr la curie de Cjase comunâl; 4. Svilupa la formazion di «Équipes pe Curie dal Creât», tes Parochiis, tes struturis diocesanis e tai servizis educatîfs; 5. Inspirâ la curie dal Creât cu la preiere, te liturgjie, te predicazion, mediant dai mieçs di comunicazion; 6. Adotâ Liniis di azion diocesanis tai setôrs de riduzion des scovacis, de conservazion da l'aghe, des compris ecologjichis, de gjestion dai terens, dai traspuarts, de gjestion dai documents e des stampis; 7. Spargnâ energie e doprâ energiis rinnovabils; 8. Messedâsi a pro de justizie ambientâl, colaborant cun chês altris Glesis cristianis e cu lis organizacions laichis; 9. Ocupâsi des vitimis e dai dispatriâts par colpe de degradazion ambientâl; 10. Cjapâ note e comunicâ i progrès otignûts te curie dal Creât di Diu, cui mieçs di comunicazion, cun declarazions publichis e intant des riunionis foraniâls e di convegni di pueste.

Mario Zili

Aur blu o Sûr Aghe? Un cors par difindi une risorse preziose

Dal 1 ai 3 di Avrîl, la clape di formazion culturâl e sientifiche «Casa Comune», metode sù dal «Gruppo Abele», e propon il cors «on line» e «a muse» (li de «Certosa» di Avigliana, te provincie di Turin) «Sorella Acqua», dedicât a «L'oro blu: una preziosa risorsa a rischio». Il pont di partence al sarà l'Encicliche «Laudato si'» e i profundiments a tocjaran la crisi climatiche, la biodiversitât, lis contaminazions ambientâls, il sfrutament idroelettric, lis responsabilitâts personâls e coletivis e l'antropologjie visuâl (www.casacomunelaudatoqui.org/prossimi-corsi/).



Messe in marilenghe

A Udin, la Messe par furlan e ven cjantade ogni sabide, a 5 e mieze soresere (17.30), li de capele de «Puritât», daprûf dal domo. Sabide ai 26 di Març al cjantarà messe Bons. Duilio Corgnali. Radio Spazio e trasmet sul moment, ogni setemane, dute la celebrazion.

Peraulis in dismentie

par cure di Mario Martinis

TAMANE

s.f. = paniera, cesta
(da confrontare con tamês, con il quale condivide la radice)
Miôr che tu ti puartis daûr la tamane dal gustâ.
Meglio tu ti porti dietro il panier del pranzo.

TAMÊS

s.m. = setaccio, staccio
(dal celtico tamisium "staccio")
La farine e ven ancjemò plui fine se tu la passis pal tamês.
La farina viene ancora più fina se la passi al setaccio.

TAPON

s.m. = coperchio
(dal gotico tappa "tappo")
Met un tapon a chel vâs!
Metti un tappo a quel vaso!

TARLUPÂ

v. = balenare, lampeggiare, guizzare
(da tarlup "lampo")
A soreli a mont al tarlupe di continuo.
A occidente lampeggia di continuo.
"Al e un pôc tarlupât" (Ciani)

TASSE

s.f. = catasta, specialmente di legna
(dal francone *tass indicante l'intassare, l'ammucchiare)
Une tasse di madons no baste par fâ sù une cjase.
Una catasta di mattoni non basta per fare una casa.

TAVIELE

s.f. = campagna, parte coltivata del terreno comunale
(dal latino tabella, diminutivo di tabula "tavola")
Usgnot i grîs a cjantin te taviele sot un biel clâr di lune.
Stasera i grilli cantano in campagna sotto un bel chiaro di luna.